



Sumiiffinni nunami aalajangersimasuni nunaminertanik atuinissamut akuersissuteqarluni takornariartitsisarneq Inatsisartut inatsisaannik nr. 19, 3. december 2012-meersumik tunngaveqartoq pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Vivian Motzfeldt Siumut)

Siullermik qujanaq oqallisissiamut.

Takornariaqarnermi nunatsinni ineriartorluartut ilagaat. Tamattalu qularutissaanngitsumik innuttaasunut nunatsinnullu ajunnginnerpaamik peqataaffigineqartuutamik ineriartornissaa anguniagaraarput.

Nunaminertanik atuinissamut akuersissuteqarluni takornariaqartitsineq nunatsinni atuuttoq Naalakkersuisuniit nassuiaanneqarneranut qujarusuppunga. Tassanimi takutinneqarpoq piumasaqaatit atuuttut erseqqissarneqarmata.

Taamaakkaluartuq piviusoq takugutsigut nunatsinni takornarialerinermi ineriartortitseqataasut nunatta avataaneersut ikigisassaangillat. Tamanna siunnersuummut tunngaveqaqataanera ilimagilluinnarpara.

Ullumikkut takornariaqarnikkut ilinniarfigisinnaasat amerlagisassaangillat nunatsinni ilinniarfigisinnaasat, tassaasut Niuernermik Ilinniarfimmi Service Økonomitut ilinniarfik takornariaqarneq immikkut sammisaralugu taavalu Issittumi takornarissanik angallasineq pillugu ilinniagaq nutaaq. Aamma Inuilimi Receptions og turismeassistentitut ilinniarfik.

Uanga isumaqarpunga tamakku aamma ineriartortitassarigigut aammalu pingaartitassarigivut nunatsinni takornarialerisut amerlanerussappata nunatsinninngaaneersut.

Soorunami aamma ullutsinni periarfissaapput siunnersorneqarneq pisortaniit soorlu Greenland Business, Inuusutissarsiornermut Siunnersortit ilaalu, taakku aningaasatigut allatigullu ikorfartorneqarneq tunniussinnaasarpaat. Qanorlu tamakku atorineqarnissai innuinnasunut paasissutigineqarnissaa pingaaruteqarluinnarpoq atorluarneqassappata.

Takornariaqarnikkut anguniagaqarnissarput pingaaruteqarluinnarpoq. Taamaattumik Inuit Ataqatigiinniit qilanaaraarput Takornariaqarnermut periusissiaq naammassineqarnissaa. Tassuuna ingerlariaqqinnissamut tikkuussineq ersarissaq takorusukkatsigu.

Taamatut naatsumik oqaaseqarlunga siunnersuummut qujaqqippunga.